

佛陀教誡

無逸不死道，放逸趣死路。無逸者不死，放逸者如屍。
智者深知此，所行不放逸。不放逸得樂，喜悅於聖境。
智者常堅忍，勇猛修禪定。解脫得安隱，證無上涅槃。
奮勉不放逸，克己自調禦，智者自作洲，不為洪水沒。

《法句經·第 21-3, 5 偈》

若見彼智者——能指示過失，並能譴責者，當與彼為友；
猶如知識者，能指示寶藏。與彼智人友，定善而無惡。

《法句經·第 76 偈》

彼於戰場上，雖勝百萬人；未若克己者，戰士之最上！
能克制自己，過於勝他人。若有克己者，常行自節制。

《法句經·第 103-4 偈》

若人壽百歲——破戒·無三昧，不如生一日——持戒·修禪定。
若人壽百歲——無慧·無三昧，不如生一日——具慧·修禪定。
若人壽百歲——怠惰·不精進，不如生一日——勵力行精進。
若人壽百歲——不見生滅法，不如生一日——得見生滅法。
若人壽百歲——不見不死道，不如生一日——得見不死道。

《法句經·第 110-4 偈》

應急速作善，制止罪惡心。怠慢作善者，心則喜於惡。
若人作惡已，不可數數作；莫喜於作惡，積惡則受苦。
若人作善已，應復數數作；當喜於作善，積善則受樂。
惡業未成熟，惡者以為樂。惡業成熟時，惡者方見惡。
善業未成熟，善人以為苦。善業成熟時，善人始見善。
莫輕於小惡！謂「我不招報」，須知滴水落，
亦可滿水瓶，愚夫盈其惡，少許少許積。
莫輕於小善！謂「我不招報」，須知滴水落，
亦可滿水瓶，智者完其善，少許少許積。

《法句經·第 116-22 偈》

II 佛陀教誡

得生人道難，生得壽終難，得聞正法難，遇佛出世難。
一切惡莫作，一切善應行，自調淨其意，是則諸佛教。

諸佛說涅槃最上，忍辱為最高苦行。

害他實非出家者，惱他不名為沙門。

不誹與不害，嚴持於戒律，飲食知節量，

遠處而獨居，勤修增上定，是為諸佛教。

諸人恐怖故，去皈依山嶽，或依於森林，園苑·樹支提。
此非安穩依，此非最上依，如是皈依者，不離一切苦。
若人皈依佛，皈依法及僧，由於正智慧，得見四聖諦。
苦與苦之因，以及苦之滅，並八支聖道，能令苦寂滅。
此皈依安穩，此皈依無上，如是皈依者，解脫一切苦。

《法句經·第 182-5; 188-92 偈》

「一切行無常」，以慧觀照時，得厭離於苦，此乃清淨道。

「一切行是苦」，以慧觀照時，得厭離於苦，此乃清淨道。

「一切法無我」，以慧觀照時，得厭離於苦，此乃清淨道。

《法句經·第 277-9 偈》

若棄於小樂，得見於大樂。智者棄小樂，當見於大樂。
施與他人苦，為求自己樂；彼為瞋繫縛，怨憎不解脫。
應作而不作，不應作而作，傲慢·放逸者，彼之漏增長。

《法句經·第 290-2 偈》

雜草害田地，貪欲害世人。施與離貪者，故得大果報。
雜草害田地，瞋恚害世人。施與離瞋者，故得大果報。
雜草害田地，愚癡害世人。施與離癡者，故得大果報。
雜草害田地，欲望害世人。施與離欲者，故得大果報。

《法句經·第 356-9 偈》

善哉制於眼，善哉制於耳，善哉制於鼻，善哉制於舌，
善哉制於身，善哉制於語，善哉制於意，
善哉制一切，制一切比丘，解脫一切苦。

《法句經·第 360-1 偈》